



# Lescha santeri Revisiun parziala

## M E S S A D I

dalla suprastonza communal a al cussegl da vischnaunca

Preziada signura presidenta  
Preziadas signuras cusseglieras  
Preziai signurs cussegliers

La vischnaunca da Mustér posseda in bi e dign santeri. Las restauraziuns dils davos onns sco era il sistem ein secumprovai. Nus possedein era sufficientamein spazi da satrar. Tenor il plan da fossas vegnan entochen la fin digl onn 2013 61 fossas libras sisum il santeri a Sogn Gions.

La situaziun davart il satrar dils davos quater onns muossa che pli u meins la mesadad dils defuncts vegnan cremai. Pil pli vulan ils defuncts cremai vegnir satrai ella medema fossa sco il partenari ch'ei ius ordavon.

Aschinavon ch'il diember da sepulturas da baras semova el rom dils onns precedents, duess il spazi el santeri tonscher entochen la fin digl onn 2013. Per las urnas ha ei avunda plazs. Igl ei previu da crear ina fossa comunabla per urnas sisum santeri. Pli tard vegn ins ad entscheiver cun ina nova retscha giudem santeri.

Sco previu el program d'actividad ha la suprastonza communal decidiu d'instradar ina revisiun parziala dalla lescha davart il satrar ed igl uorden da santeri. Quella serestrenscha sin adattaziuns da tempra formala, damai che nossa lescha corrispunda da principi allas relaziuns hodiernas. Las midadas sedattan oravontut entras la nova constituiun communal. Tenor quei niev sistem ei la suprastonza communal cumpetenta da relaschar il regulativ da taxas. La suprastonza preveda denton buca ina midada da quellas, damai che quellas tonschan per cuvierer ils cuosts che occuoran.

Tier l'examinaziun e cumparegliaziun cun las reglamentaziuns d'autras vischnaucas, havein nus constatau che nossas prescripziuns davart la dimensiun dalla fossa sco era las mesiras per cruschs e monuments (art. 14 e 16) ein fetg detagliadas. En pliras vischnaucas eis ei menziunau nuot. Las autoritads communalas han a sias uras sapientivamein vuliu quella reglamentaziun detagliada per dar ina biala cumparsa al santeri. Perquei cunvegn ei da buca midar quei sistem. La suprastonza vul sulettamein haver la pusseivladad e la basa legala da saver sviar en cass specials da quellas normas rigurusas (art. 19bis ni niev 20).

## Proposta

Sin fundament da quellas ponderaziuns

p r o p o n a

la suprastonza communal al cussegl da vischnaunca:

1. d'approbar la revisiun parziala dalla lescha santeri;
2. da suttametter quei conclus conform ad art. 21, lit. b dalla constituiun communal al referendum facultativ.

Suprastonza communal Disentis/Mustér

Il president:

  
Dr. Dumèni Columberg

Il vicecanzlist:

  
Romeo Schmed

Disentis/Mustér, ils 26 da fenadur 2011

### Annexas:

- Lescha santeri (sboz)
- Regulativ da taxas tier la lescha santeri